

## ISUMALIUTISSIISUT

### Ilaqutariinnermut Peqqissutsimullu Ataatsimiititaliap

**Uunga siunnersuummut: Siusinaartumik pensionisiat pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2020-imeersoq**  
*Isumaginninnermut, Ilaqutariinnermut Inatsisinillu Atuutsitsinnermut Naalakkersuisumit saqqummiunneqartoq*

### siunnersuutip aappassaaneerpeqarneranut tunniussaa

Ataatsimiititaliap suliarinninnermini uku ilaasortarai:

Inatsisartunut ilaasortaq Malene Vahl Rasmussen, Demokraatit, siulittaasoq  
Inatsisartunut ilaasortaq Mikivsuk Thomassen, Inuit Ataqtigiit, siulittaasup tullia  
Inatsisartunut ilaasortaq Anders Olsen, Siumut  
Inatsisartunut ilaasortaq Nikkulaat Jeremiassen, Siumut  
Inatsisartunut ilaasortaq Bo Martinsen, Demokraatit  
Inatsisartunut ilaasortaq Peter Olsen, suppleant, Inuit Ataqtigiit  
Inatsisartunut ilaasortaq Stine Egede, Inuit Ataqtigiit

UKA2020-imi oktoberip aallaqqaataani siullermeerinninnerup kingorna siunnersuut ataatsimiititaliap misissorpaa.

#### 1. Siunnersuutip imarisaa siunertaalu

Siusinaartumik pensionisiaqarneq pillugu maalaarutinik suliaqarsinnaanermut siusinaartumik pensionisiaqarnermut maalaaruteqartarfiup piginnaatinneqarneranik, aamma qulaajaanerit ingerlanneqarneranut kiisalu siusinaartumik pensionisianik qinnuteqarnermi piginnaangorsaqqinnerup ingerlanneqartarnera pillugit siunnersuummi erseqqissarneqarpoq. Taama siunnersuuteqarnikkut innuttaasut siunissami sulilersinnaasut piginnaangorsaqqinnissartik kinguartikkallarsinnaavaat, taamaaliornikkut innuttaasut piginnaangorsaqqinnissartik aallartissinnaaneraat ingerlaavartumik nalilersorneqarsinnaaqqullugu. Siunnersuut ulloq 1. januar 2021-imi atuutilersinneqarnissaa siunnersuutigineqarpoq.

## **2. Siunnersuutip Inatsisartunit siullermeerneqarnera**

Siunnersuut partiinit amerlanerussuteqartunit tapersorneqarpoq. Siusinaartumik pensionisiat naatsorsorneqarneranni inooqatigisap/nuliaasup/uiusup isertitai naapertorlugit ilanngaavigineqarsinnaanerat aammalu siusinaartumik pensionisiaqalerniarluni qinnuteqarnermi sullissinnermut piffissaq atorneqartartup siviluallaarnera partiit ataasiakkaat ernumassutigalugu oqaatigaat, taamaattumik inatsisip allangortinneqarnissaa pisariaqarsorinarluni, taamaaliornikkut siusinaartumik pensionisiaqalernissamik akuerineqartoq ullormi qinnuteqarfigisaminiit naatsorsorneqarsinnaalersinnaaqullugit.

## **3. Tusarniaanermi akissuteqaat**

Tusarniaanermi akissuteqaatit tunniunneqartut inatsisissatut siunnersuummut ilanngunneqarput, tamannalu Inatsisartut siulittaasoqarfiata piumasaqaataanut naapertuuppoq.

Siusinaartumik pensionisiat pillugit inatsimmi atuuttumi<sup>1</sup> §§-inut 15, 16, 17 aamma 31-imut naapertuuttunik Tilioq akissuteqarsimasoq Ilaqutariinnermut Peqqissutsimullu Ataatsimiititaliamit maluginiarneqarpoq. Tassani pineqarput innuttaasut innarluutillit sulisinnaanngitsut aapparisaq isertitai kisiisa isumalluutigilersinnaammattigit. Kiisalu kommunalbestyrelsi akuersissuteqarneranit aatsaat qaammatip ataatsip qaangiunneratigut siusinaartumik pensioninik tunineqarnissamut pisinnaatitaaffiup atuutilernissaa aammalu minnerunngitsumik sullissinerup pisariaqanngitsumik siviluallaartarnera uparuarneqarlutik.

Kommuninut tusarniaanermi akissuteqaatit tunngavigalugit pisariaqartitsineq naapertorlugu Naalackersuisut ilaatigut allanguutinik ilanngussimasut ataatsimiititaliamit maluginiarneqarpoq.

## **4. Apeqquteqaat**

Isumaginninnermut, Ilaqutariinnermut Inatsisinillu Atuutsitsinnermut Naalackersuisoq apeqqutigineqartunut arlalinnut akissuteqassasoq ataatsimiititaliap siunnersuummik suliaqarnermini atugasaanik ataatsimiititaliaq qinnuteqarpoq. Ataatsimiititaliap apeqquteqaataasa aamma Isumaginninnermut, Ilaqutariinnermut Inatsisinillu Atuutsitsinnermut Naalackersuisup akissuteqaataasa assilineqarneri isumaliutissiisummut matumunnga ilanngussaq 1-itut ilanngunneqarput. Ataatsimiititaliap Naalackersuisoq qinnuigivaa innuttaasut sorliit siunissami sulisinnaassusiat ineriartortinneqarsinnaanersut itisileeqqullugu.

## **5. Ataatsimiititaliap siunnersuummik suliarinninnera**

Isumaginninnermut maalaaruteqartarfimmi aamma Siusinaartumik Pensionisiat pillugit

---

<sup>1</sup> Siusinaartumik pensionisiat pillugit Inatsisartut inatsisaat nr 40, 9.dec-meersoq, Inatsisartut inatsisaanni nr. 28, 28. nov. 2019-imi allangortinneqartoq

maalaaruteqartarfimmi naammagittaalliuutunik suliaqarnermi akisussaaffiit agguataarneqarnerat pillugu tusarniaaffigineqartut ilaasa siunnersuutip nalornilersitsisimanera siullertut Ilaqutariinnermut Peqqissutsimullu Ataatsimiititaliamit maluginiarneqarpoq. Tamatumunnga atatillugu inatsimmi allanngineq aamma atuutsinneqarnera pillugu paasissutissat peqqissaartumik atuaruminartumillu suliarineqartarnissaat Naalakkersuisut qulakkiissagaat ataatsimiititaliamit kaammattuutigineqarpoq.

Innuttaasut sukkanerusumik sullinneqartalernissaannut siunnersuutip nukittorsaataanissaa naatsorsuutigineqartoq ataatsimiititaliamit paasineqarpoq, erseqqissaatigissalluguli kommuninik suleqateqarnermi suleriaatsip ataavartumik malinnaaffigineqassasoq. Kiisalu paasinnittaatsimut ingerlatsinermullu tunngasutigut, soorlu, sullissinerit arriippallaartut aamma siusinaartumik pensionit amerlassusilerneqartarnerisa aalajangiivigineqartarneranik ajornartorsiutit ilaatigut tusarniaanermi akissuteqaatini atuarneqarsinnaasut aammalu siullermeerinninnermi oqaatigineqartut Naalakkersuisut kommunit suleqatigalugit eqqumaffigissagaat.

Inatsisip allanngortinneqarnerani kommunalbestyrelsi qulaajaaneriit aallartinneqarnissaannik kiisalu inunnut ataasiakkaanut naleqqussakkanik piginnaangorsaqqiinernut akuersissutinik inatsit aqputigalugu annertuumik akisussaaffilerneqassasut ataatsimiititaliamit oqaatigineqassaaq. Suliani assersuutigalugu nakorsamit/peqqissutsikkut tunngasutigut misissorneqarnissamik pisariaqartitsisoqartillugu peqqinnissaqarfimmik suleqateqarnissamut periarfissap atuuttup tamakkiisumik atorluarneqarnissaa Naalakkersuisumit qulakkeerneqassasoq ataatsimiititaliamit kaammattuutigineqassaaq, taamaaliornikkut piginnaangorsaqqiinnissamut suliaassat pisariaqanngitsumik misissuinerit utaqqisitsinnginniassammata. Pingaartumik piginnaangorsaqqiinnissamut kinguartitsisimasunut ukiup ataatsip qaangiunnerani nutaamik naliliivigineqatigittussanut tunngatillugu. Piginnaangorsaqqiinnerit sungiusaqqiinnerillu pillugit suliniutit katsorsaanerillu ataatsikkut ingerlanneqarnissaat pisariaqarsinnaammata kiisalu innuttaasut arlalinnit nalilerneqartarnissaat pisariaqartoq ataatsimiititaliamit ilanngullugu erseqqissaatigineqarpoq.

Qulaajaanernut piginnaangorsaqqiinnernullu takkutinngitsoornerni peqataanngitsoornernilu kinguneqartitsisarneq pillugu malittarisassiornissamut Naalakkersuisut piginnaatitaanerit ilanngullugu ataatsimiititaliamit maluginiarneqarpoq. Ataatsimiititaliap naliliinera naapertorlugu takkutinngitsoornerit peqataanngitsoornerillu assigiinngitsorpasuarnik peqquteqarsinnaasut taamaattumillu tamakku qulaajarneqarnissaannut peqqissaartumik malittarisassiortoqarnissaa kaammattuutigineqarpoq. Qinnuteqartup suliaq ingerlanneqarnerani suleqataasariaqartoq suliallu namminerminut tunngasut akisussaaffigigai naatsorsuutigineqartoq ataatsimiititaliaq isumaqarpoq. Qinnuteqartumut erseqqissumik nassuiaatigineqarnissaa ataatsimiititaliap kaammattuutigaa. Innuttaasut qulaajaaffigineqarnerminni/piginnaangorsaqqiinnermilu sapinngisamik annertunerpaamik

sunniuteqaqataanissaat aammalu sumiluunniit najugaqaralarunik kommuneqaralarunilluunniit sulileqqinnissamut periarfissat atugassarititaasullu pitsaasumik qulakkeerneqarnissaat naggataatigut ataatsimiititaliamit kaammattuutigineqassaaq.

Siusinaartumik pensionisiat pillugit inatsisip siunissami nutarterneqarnissaani ilisimatinneqartarnissaq annertuumik kissatigineqarmat ataatsimiititaliamit matumuuna oqaatigineqassaaq.

## 6. Siunnersuutip aningaasatigut kingunerisassai

Siunnersuummut nalinginnaasumik oqaaseqaatinik allassimavoq, siunnersuutip atuutilersinneqarnerani aningaasatigut kinguneqartitsisoqassanngitsoq. Tamanna tunngavigalugu allatut naliliinissamik ataatsimiititaliamit tunngavissaqartinneqanngilaq.

## 7. Ataatsimiititaliap inassuteqaatai

- Ataatsimiititaliap isumaqatigiittup siunnersuutip akuerineqarnissaa inassutigaa

Siusinaartumik pensionisiat pillugit inatsisip siunissami nalilersuisarnissani siusinaartumik pensionisiat inaarutaasumik naatsorsorneqarneranni inooqatigisap/nuliaasup/uiusup isertitaat ilanngunneqartannginnissaat qulakkeerneqarnissaa ataatsimiititaliamit Naalackersuisut **kaammattorneqarput**, siusinaartumillu pensionisiaqalersinnaanermut pisinnaatitaaffeqarneq ullormi qinnuteqarfiusumiit naatsorsorneqartassasoq siusinaartumillu pensionisiaqalernissaq pillugu kommunalbestyrelsip qanga aalajangiisimanera aallaavigineqartassanngitsoq **kaammattuutigalugu**.

Siusinaartumik pensionisiat pillugit inatsisip siunissami nalilersorneqartarnissaani ataatsimiititaliap kissaatigisorujussuullugu taamaalilluni oqaatigaa.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.



---

Malene Vahl Ramussen  
Siulittaasoq



---

Mikivuk Thomassen  
Siulittaasup tullia



---

Anders Olsen



---

Stine Egede



---

Nikkulaat Jeremiassen

---

Bo Martinsen



---

Peter Olsen, suppleant